



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-1-40-123-7/23**

Datum: **27.11.2023. godine**

„Agencija za vodno područje rijeke Save“ Sarajevo (u daljnjem tekstu: Agencija) rješavajući po zahtjevu pravnog lica LAGER d.o.o. Posušje za izdavanje prethodne vodne saglasnosti za ispuštanje tehnoloških otpadnih voda i specifičnih uticaja na vode sa prostora površinskog kopa mrkog uglja Majdankići, na osnovu člana 121. stav (3) Zakona o vodama („Službene novine Federacije BiH“, broj 70/06) i člana 67. stav (2) Zakona o upravnom postupku („Službene novine Federacije BiH“, broj 2/98, 48/99 i 61/22), donosi

ZAKLJUČAK

Odbacuje se zahtjev pravnog lica LAGER d.o.o. Posušje, za izdavanje prethodne vodne saglasnosti za ispuštanje tehnoloških otpadnih voda te specifičnih uticaja na vode sa prostora površinskog kopa Majdankići, predviđenog za formiranje u naselju Fajtovci, područje općine Sanski Most, zbog nepotpunosti dokumentacije i smatra se kao da nije niti podnesen.

Obrazloženje

Pravno lice LAGER d.o.o. Posušje, obratilo se ovoj Agenciji dana 20.03.2023. godine, aktom broj: 0222/23, zahtjevom za izdavanje prethodne vodne saglasnosti za izradu obodnih kanala i taložnika u cilju odvodnjavanja površinskog kopa Majdankići, koji bi se formirao u cilju eksploatacije mrkog uglja, lociran u naselju Fajtovci, područje općine Sanski Most.

Uz zahtjev je priložena slijedeća dokumentacija:

- Rješenje o registraciji; izdano od strane Općinskog suda u Širokom brijegu pod brojem 064-0-Reg-11-000110, dana 08.04.2011. godine (ovjerena kopija),
- Nalog za plaćanje upravne pristojbe (kopija),
- Uvjerjenje o registraciji poreznog obveznika; izdano od strane Federalnog ministarstva financija – finansija, Porezne uprave Federacije Bosne i Hercegovine, Kantonalnog poreznog ureda Ljubuški, dana 14.01.2022. godine (ovjerena kopija),
- Studija za izdavanje prethodne vodne saglasnosti za eksploataciju mrkog uglja na površinskom kopu Majdankići; urađena od strane Instituta za kvalitet, standardizaciju i ekologiju „TQM“ Lukavac pod brojem protokola: 1245/23, marta 2023. godine.

Uvidom u dostavljenu dokumentaciju konstatirano je da je za predmetnu aktivnost potrebno pribaviti prethodnu vodnu saglasnost za ispuštanje tehnoloških otpadnih voda te zbog specifičnih uticaja na vode pri izvođenju aktivnosti eksploatacije mrkog uglja na predmetnoj lokaciji.

Također je konstatirano da dostavljena dokumentacija nije dovoljna za obradu predmetnog zahtjeva te je podnosilac zahtjeva službenim putem, dana 17.04.2023. godine, obaviješten da je predmetni zahtjev nepotpun te da podnosilac zahtjeva treba da u roku od 60 (šezdeset) dana, od dana prijema obavijesti, dopuni podnesak zahtjeva sa slijedećom dokumentacijom:

- Studiju za izdavanje prethodne vodne saglasnosti treba dopuniti u skladu sa članom 5. Pravilnika o sadržaju, obliku, uvjetima, načinu izdavanja i čuvanja vodnih akata, na način:
 - Dati tehničko-tehnološko rješenje objekta, najmanje na nivou idejnog projekta sa svim potrebnim proračunima i tehničkim opisom,
 - Proračun količina i sastava otpadnih voda, odnosno opasnih i štetnih materija, uključujući i oborinske vode sa prostora privremenog depoa klasiranog uglja, i sl.,
 - Tehničko rješenje prečišćavanja otpadnih voda za postizanje propisanih uslova kvaliteta vode prijemnika pri mjerodavnom protoku, najmanje na nivou idejnog projekta sa svim potrebnim proračunima i tehničkim opisom,
 - Tehničko rješenje skladištenja, odnosno odlaganja opasnih i štetnih materija, privremeno skladištenje sirovog ili klasiranog uglja, i sl.,

- Mogućnost nastajanja i drugih uticaja na režim voda ili uticaj režima voda na stanovništvo, objekte, radove i okolinu.
 - Tehničko rješenje za monitoring i način monitoringa količina zahvaćenih, ispuštenih otpadnih voda i drugih parametara režima voda kao što su; nivoi voda, praćenje ekološki prihvatljivog protoka, i sl.
 - Način crpljenja te mjesto ispusta vode iz otvorenog prostora površinskog kopa. Dati šematski prikaz transporta vode iz jame površinskog kopa do recipijenta.
 - Situacioni prikaz površinskog kopa rudnika sa položajem postrojenja za drobljenje i klasiranje uglja, položaj privremene deponije klasiranog uglja, položaj paltoa za servisiranje i tankovanje radnih mašina, položaj uređaja za tretman otpadnih voda (taložnici, odvajači naftnih derivata, septik, i sl.) mjesto za skladištenje opasnog otpada, naftnih derivata, i slično.
 - Na situacionom rješenju šematski prikazati sistem za transport oborinske vode sa prostora jame površinskog kopa, počev od mjesta zahvata, taloženja/bistrenja zahvaćene vode, mjesta za tretman i monitoring otpadnih voda te trasu odvoda prečišćene vode do recipijenta. Ukoliko se odvod prečišćene vode odvodi cestovnim kanalom, ili slično, treba pribaviti saglasnost upravitelja ceste. Ako se odvod prečišćene vode i oborinske vode sa prostora jame površinskog kopa do recipijenta vrši polaganjem cijevnog voda, sistemom otvorenih ili zatvorenih kanala, potrebno je prikazati trase odvoda preklapljenе preko katastarske podloge. Ako se odvod vrši preko privatnog zemljišta, potrebno je u skladu sa članom 150. Zakona o vodama, pribaviti saglasnost vlasnika.
 - Dati opis crpljenja oborinske vode iz jame rudnika te način kako spriječiti da se talog sa dna jame izbacuje zajedno sa oborinskom vodom u recipijent - vodotok.
 - Predvidjeti mogući negativni uticaj rada rudnika na rijeku Modrašnicu, koja protiče kroz eksploataciono polje te prijedloge za sprečavanje negativnih uticaja.
 - Ostala pitanja od značaja za vode u konkretnom slučaju.
 - Zemljišnoknjižni izvadak za parcele površinskog kopa, odnosno trase odvoda prečišćenih voda do recipijenta, izdan od strane nadležnog zemljišno-knjižnog ureda Općinskog suda (original ili ovjerena kopija),
 - Kopiju katastarskog plana za parcele površinskog kopa, odnosno trase odvoda prečišćenih voda do recipijenta, izdan od strane nadležnog općinskog/gradskog tijela uprave sa upisanim podacima o nekretnini, posjedniku, i dr. (original ili ovjerena kopija ne starija od 6 mjeseci).
 - Mišljenje o usklađenosti planiranih aktivnosti sa dokumentima prostornog uređenja, izdano od strane organa uprave nadležnog za prostorno planiranje.
- Dana 23.06.2023. godine podnosilac zahtjeva je izvršio dopunu podneska zahtjeva slijedećom dokumentacijom:
- Popratni akt, broj: 33/23 od 19.06.2023. godine,
 - Korigiranu Studiju prema prethodno proslijeđenoj obavijesti o dopuni podneska zahtjeva,
 - Kopiju katastarskog plana, Katastarska općina: FAJTOVCI, Broj plana: 16, Nomenklatura lista: 6A22-18-3; izdana od strane Službe za imovinsko-pravne, geodetske poslove i katastar nekretnina pod UR BROJ: 06-26-631/2023-3, dana 19.06.2023. godine,
 - Kopiju katastarskog plana, Katastarska općina: FAJTOVCI, Broj plana: 16, Nomenklatura lista: 6A22-18-3; izdana od strane Službe za imovinsko-pravne, geodetske poslove i katastar nekretnina pod UR BROJ: 06-26-631/2023-2, dana 19.06.2023. godine,
 - Zemljišnoknjižni izvadak, BROJ: 022-0-NAR-23-003 296, Zemljišnoknjižni uložak broj: 344, Katastarska općina: FAJTOVCI; izdan od strane ZEMLJIŠNOKNJIŽNOG UREDA Općinskog suda u Sanskom Mostu, dana 19.06.2023. godine,
 - Zemljišnoknjižni izvadak, BROJ: 022-0-NAR-23-003 297, Zemljišnoknjižni uložak broj: 179, Katastarska općina: FAJTOVCI; izdan od strane ZEMLJIŠNOKNJIŽNOG UREDA Općinskog suda u Sanskom Mostu, dana 19.06.2023. godine,
 - IZVJEŠTAJ O DNEVNIKU, Broj dnevnika: 022-0-DN-21-001 170; izdan od strane Zemljišnoknjižnog ureda Općinskog suda u Sanskom Mostu, dana 19.06.2023. godine,
 - Zaključak, kojim se odbacuje zahtjev investitoru Lager d.o.o. iz Posušja sa sjedištem u ul. Južna obilaznica bb, za izdavanje urbanističke saglasnosti za površinsku eksploataciju mrkog uglja na lokalitetu Zlaue-Fajtovci-Gornji Kamengrad, a zbog nenadležnosti; izdan od strane Federalnog ministarstva prostornog uređenja pod brojem UPI/03-23-2-122/17, dana 20.04.2017. godine, u Sarajevu (kopija),

Pregledom dostavljene dokumentacije konstatirano je slijedeće:

- Studija za izdavanje prethodne vodne saglasnosti za eksploataciju mrkog uglja na površinskom kopu Majdankići, urađena od strane Instituta za kvalitet, standardizaciju i ekologiju TQM d.o.o. Lukavac, broj protokola: 1245/23, od juna 2023. godine,

- *Studija je djelimično dopunjena prema proslijeđenoj obavijesti,*
- Popratnim aktom o dopuni podneska zahtjeva, broj: 33/23 od 19.06.2023. godine, podnosilac zahtjeva se izjasnio da organ uprave nadležan za prostorno planiranje u općini Sanski Most trenutno nema nikakav dokument prostornog uređenja kao ni USK vezano za područje Sanskog Mosta, a za iste stvari ne izdaju mišljenja niti daju saglasnost već po zaključku FMPU za sva eksploataciona polja veća od 5 ha to ministarstvo izdaje slične dokumente pa dostavlja njihove zaključke kao urbanističku dozvolu za sve rudarske objekte i radove unutar predmetnog eksploatacionog polja,
 - *Mišljenje o usklađenosti predmetne aktivnosti sa prostorno planskom dokumentacijom može dati samo organ uprave nadležan za prostorno planiranje (ako je za predmetnu aktivnost nadležan kanton ili entitet, svejedno moraju pribaviti saglasnost i lokalne zajednice – općina/grad). Ako se općinski/kantonalni organ uprave, koji je nadležan za prostorno planiranje, očitovao na način kako navodi podnosilac zahtjeva, treba nam dostaviti njihov akt. Zaključak, broj: UPI/03-23-2-122/17, izdan dana 20.04.2017. godine od strane Federalnog ministarstva prostornog uređenja, a na koji se poziva podnosilac zahtjeva da mijenja urbanističku saglasnost, ne može mijenjati urbanističku saglasnost. Nadležno ministarstvo se proglasilo nenadležnim u konkretnom slučaju, jer je za predmetni površinski kop – reviri Zlauše i Martin, pribavljeno odobrenje za eksploataciju mrkog uglja na lokalitetu Fajtovci – Gornji Kamengrad, od nadležnog organa bivše države u prijeratnom periodu. Eksploatacija je trajala preko 30 godina i vršena je u vrijeme podnošenja zahtjeva za izdavanje urbanističke saglasnosti. Obzirom da je tražen zahtjev za izdavanje urbanističke saglasnosti za koje je već pribavljeno odobrenje za eksploataciju i na kojem je vršena eksploatacija u vrijeme podnošenja zahtjeva, nadležno ministarstvo se proglasilo nenadležnim te zahtjev zaključkom odbacilo. Dakle, ministarstvo nije odbacilo zahtjev jer za predmetnu aktivnost nije potrebno pribavljanje urbanističke saglasnosti. Pored navedenog, moramo konstatirati da se prethodna vodna saglasnost pribavlja u postupku pribavljanja urbanističke saglasnosti (ako predmetna aktivnost podliježe pribavljanju prethodne vodne saglasnosti, pribavljanje iste je jedan od uvjeta za izdavanje urbanističke saglasnosti). Stoga se i traži mišljenje organa nadležnog za prostorno planiranje (općina/grad, kanton i/ili entitet), a kako bi se utvrdilo da je predmetna aktivnost u predmetnom prostornom obuhvatu usklađena sa prostorno planskom dokumentacijom.*
- Dostavljene su kopije katastarskog plana i ZK izvatci samo za k.č. broj: 1268 i 1298 K.O. Fajtovci, općina Sanski Most
 - *(niti jedna od navedenih parcela nije na predmetnom spisku, dok za ostali dio površinskog kopa nisu priloženi podaci),*
- Dostavljen je zaključak, kojim se odbacuje zahtjev investitoru Lager d.o.o. Posušje sa sjedištem u ul. Južna obilaznica bb, za izdavanje urbanističke saglasnosti za površinsku eksploataciju mrkog uglja na lokalitetu Zlauše-Fajtovci-Gornji Kamengrad, a zbog nenadležnosti, izdanim od strane Federalnog ministarstva prostornog uređenja pod brojem: UPI/03-23-2-122/17, dana 20.04.2017. godine, u Sarajevu,
 - *Zaključak se odnosi na lokalitet Zlauše – Fajtovci – Gornji Kamengrad (reviri Zlauše 59,37 ha i Martin 4,30 ha) za koje je pribavljeno odobrenje za eksploataciju i koje je bilo u upotrebi u vrijeme podneska zahtjeva, što u predmetnom zahtjevu nije slučaj, niti se predmetni zaključak odnosi na predmetni revir – Majdankići.*
- Kao prilog Studiji je priložen i akt: spisak parcela u državnom vlasništvu unutar koncesionog područja „Zlauše-Fajtovci-Gornji Kamengrad“, izdan od strane Općinske službe za gedoetske i imovinsko-pravne poslove općine Sanski Most pod brojem 06-30-977/15, dana 14.10.2015. godine,
 - *Na predmetnom spisku nema niti jedne katastarske čestice na kojoj je predviđen predmetni obuhvat površinskog kopa (niti na situacionom prikazu niti u tehničkom opisu Studije), a isti je izdan prije cca 8 godina.*
- Kao prilog Studiji je priložen i akt br.: 03-05-235/23 od 28.02.2023. godine. Ovim aktom upravitelj javnim vodovodnim i kanalizacionim sistemom na području Općine Sanski Most – JKP „Vodovod i kanalizacija“ d.o.o. Sanski Most, konstatuje da površinski kop „Majdankići“ i „Orišlje“ se ne nalazi u zaštitnoj zoni (I, II, III, IV) izvorišta vode za piće, ali se nalazi na trasi glavnog vodovoda Lukavice-Fajtovci-Gorice.
 - *Operator vodovodnog sistema općine Sanski Moste se očitovao na način da je potvrdio da predmetni obuhvat nije u koliziji sa zonama sanitarne zaštite izvorišta za javno vodosnabdjevanje. Isto tako je navedeno da obuhvatom planiranog površinskog kopa „Majdankići“ prolazi glavni vodovod Lukavice – Fajtovci koji je u nadležnosti JKP „Vodovod i kanalizacija“ d.o.o. Sanski Most te je LAGER d.o.o. Posušje dužan prije otpočinjanja radova na*

površinskom kopu „Majdankići“ obezbijediti sredstva projektovanja, izmještanja i puštanja u funkciju vodovoda Lukavice – Fajtovci.

Pregledom dostavljene dokumentacije, kao i dostavljene dokumentacije pri dopuni podneska zahtjeva, utvrđeno je da je predmetni zahtjev i dalje nepotpun u smislu člana 2. stav (4) i člana 3. Pravilnika o sadržaju, obliku, uvjetima, načinu izdavanja i čuvanja vodnih akata („Službene novine F BiH“ br. 31/15, 55/19, 41/20 i 63/22), te je podnosilac zahtjeva, pismenim putem, aktom broj: UP-1/21-1-40-123-4/23, dana 14.07.2023. godine obavješten da isti dopuni u roku od **60 (šezdeset) dana**, od dana prijema ove obavijesti sa:

- Studiju za izdavanje prethodne vodne saglasnosti treba dopuniti u skladu sa naprijed navedenim članovima i sa članom 5. Pravilnika o sadržaju, načinu izdavanja i čuvanja vodnih akata, na način:
 - Na situacionom rješenju i detaljnoj situaciji su prikazane radne etaže te unutarnje odlagalište u fazi 2 koji su planirani preko vodotoka Modrašnice.
Nije priložen geodetski snimak sa visinskim kotama, ali, budući je uz taložnike sa obje strane rijeke predviđena pumpa, da se zaključiti da će se vršiti iskop ispod nivoa rijeke Modrašnice.
Nadalje, navodi se da će se iskopana ruda obrađivati na industrijskom platou revira Zlauše, udaljen nekoliko stotina metara od predmetnog revira. Nije definirano da li će se iskopana ruda sa dijela revira na lijevoj obali Modrašnice prevoziti makadamskim putem kroz naselje do regionalne ceste i revira Zlauše, ili se planira prevoz rude preko rijeke (kraći put).
U studiji je prikazan ispušt u potok Modrašnicu, sa obje strane potoka, prethodno izbistrenih voda u taložnicima, predviđenih na zemljištu označenom kao k.č. broj: 1268 i 1298 K.O. Fajtovci.
Sukladno članu 150. stav (1) Zakona o vodama („Službene novine Federacije BiH“, br. 70/06) je potrebno pribaviti saglasnost vlasnika predmetnih nekretnina), odnosno saglasnost za ispuštanje prečišćenih količina vode u recipijent – potok Modrašnicu, od strane nadležnog općinskog organa uprave. Isto se odnosi i na ispuste oborinskih voda sa okolnog prostora, koji se planiraju prihvatati pomoću obodnih kanala te ispuštati u potok Modrašnicu.
 - Potrebno je dati prijedlog zaštite potoka Modrašnica od štetnog djelovanja pri radovima na eksploataciji sirovine na predmetnoj lokaciji. U svrhu zaštite od štetnog djelovanja voda potoka Modrašnica te zaštite potoka Modrašnice od štetnih djelovanja pri eksploataciji sirovine na predmetnoj lokaciji je potrebno utvrditi liniju vodnog dobra te liniju plavljenja potoka Modrašnica, ranga pojave 1/100 godina. Na osnovu dobijenih podataka je potrebno predvidjeti način osiguranja da voda iz potoka se ne prelije u okno površinskog kopa, odnosno da zamuljene vode iz površinskog kopa ne dospiju u vodotok Modrašnica.
 - Ukoliko se planira izmještanje potoka Modrašnica ili uređenje vodotoka na predmetnoj lokaciji, isto je potrebno prikazati u Studiji te na osnovu iste zatražiti PVS za uređenje vodotoka, od strane nadležnog kantonalnog organa uprave.
 - Dati opis crpljenja oborinske vode iz jame rudnika prilikom kasnijeg rada rudnika, a na način kojim bi se spriječilo da se zajedno sa oborinskom vodom izbacuje i talog sa dna jame za akumulaciju oborinske vode u recipijent (slučaj pri radu rudnika na lokaciji Gornji Kamengrad – revir Zlauše).
 - Dati prijedlog izmještanja vodovodne infrastrukture Lukavice – Fajtovci te na osnovu istog zatražiti saglasnost upravitelja vodovodnog sistema – JKP Vodovod i kanalizacija d.o.o. Sanski Most, a na način kako je to uslovljeno aktom broj: 03-02-235/23 datim od strane upravitelja vodovodnog sistema, dana 28.02.2023. godine.
 - Zemljišnoknjižne izvratke za parcele unutar predmetnog prostornog obuhvata, kao i samog recipijenta, koji je predmet ovog postupka, izdan od strane nadležnog zemljišno-knjižnog ureda općinskog suda (mogu i kopije),
 - Kopiju katastarskog plana za parcele unutar predmetnog prostornog obuhvata, kao i samog recipijenta, izdan od strane nadležnog općinskog/gradskog tijela uprave sa upisanim podacima o nekretnini, posjedniku, i dr. (može i kopija)
 - Mišljenje o usklađenosti planiranih aktivnosti sa dokumentima prostornog uređenja, izdan od strane organa uprave nadležnog za prostorno planiranje (općina, kanton, entitet).
- Dana 25.09.2023. godine, podnosilac zahtjeva se obratio molbom za produženje roka za dopunu podneska zahtjeva prema prethodno proslijeđenoj obavijesti (sačinjena službena zabilješka).
Podnosiocu zahtjeva je dana 04.10.2023. godine, aktom broj: UP-1/21-1-40-122-6/23, produžen rok za dopunu podneska zahtjeva prema prethodnoj proslijeđenoj obavijesti, za narednih 30 (trideset) dana, od dana prijema iste. Podnosilac zahtjeva je upozoren da ukoliko u predviđenom roku ne izvrši traženu dopunu podneska, zahtjev će mu biti odbačen zaključkom protiv kojeg je dopuštena posebna žalba, a sve u skladu sa članom 121. stav (3) Zakona o vodama.

Obzirom da podnosilac zahtjeva nije dopunio zahtjev u predviđenom roku, kao ni do dana donošenja ovog Zaključka, to je u skladu sa članom 121. stav (3) Zakona o vodama i člana 67. stav (2) Zakona o upravnom postupku riješeno kao u dispozitivu ovog zaključka.

Uputa o pravnom lijeku:

Protiv ovog zaključka može se uložiti žalba Federalnom ministarstvu poljoprivrede, vodoprivrede i šumarstva, u roku od 15 (petnaest) dana od dana prijema Zaključka.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Ahmet Smajlović, dipl. inž. arh.

Po ovlaštenju
Rukovodilac sektora za izdavanje vodnih akata



Haris Ališehović
Haris Ališehović, dipl. inž. građ.

Dostaviti:

- LAGER d.o.o. Posušje, Podružnica Sanski Most, Naprelje bb, 79 260 Sanski Most,
- AVP Sava – ISV – Vodna knjiga
- 0 Sektor 40 - arhiva
- oglasna ploča AVP Sava